

MOKO KATI NA MILIÓ



Natondi yo, Ndeko Shakarian. Mbote, baninga na ngai. Ezali solo malamau kozala lisusu awa na Los Angeles na ntongo ya lelo, liboso na likita monene oyo, pe na liyangani ya póso oyo ezali koya kuna na Hotel Embassy. Nazali kolikia ete nakomona bino nyonso kuna. Bongo biso nyonso tozali kozela na motema lúkúluku mpenza mpo na kokutana na Nkolo na biso Yesu, mpo na komona Ye kuna. Alakaki ete Akozala. “Esika bato mibale to misato bakosangana,” Akozala wana.

² Pe nayebi solo ete nakutani na Ye na ntongo ya lelo wana nazalaki komata na ebuteli mpo na kokota awa na eyanganelo oyo, ntango bato nyonso bazalaki kozela bilei ya ntongo pe liteya na mitema lúkúluku. Pe ezali malamau kosangana awa elongo na bino, pe mpo na balandi na radio. Bato baleki mingi awa na kati, bazali . . . nasengelaki kokita na etáje oyo elandi, mpo naloba na ndambo na bato. Bongo namoni malombo ebele mpenza, mpasi ya mitema, pe makono ndenge na ndenge ya nzoto na bango, pe tozali sasaipi awa mpo na kobondela mpo na babeli pe bato na mawa.

³ Bobele ntango nakomaki na suka ya ebuteli . . . Nazali kotala elombe mobange yango sikawa. Ayaki epai na ngai, pe alobaki: “Ndeko Branham, mibu eleki . . .” Alobaki ete azalaki na mpasi makasi ya motema na lolenge ete a . . . bato bakanisaki ete alingaki kokufa. Bongo nabondelaki mpo na ye, pe ngolu na Nzambe ebikisaki ye. Pe ye oyo na ntongo ya lelo, aleki mibu ntuku mwambe, azali mpenza kosepela. Na bongo yango ezali kosala ete tozua elikia ya sika.

⁴ Pe sikawa nazali solo kosenga mabondeli ya bato oyo bazali kolanda na radio, lokola pe ya baoyo bazali awa. Nsima na ngai kolongwa na liyangani oyo, nakokende na mayangani na Eropa, kino na Afrika pe zongazonga. Pe yango ezali kotambola yengebene na emononeli moko, na bongo ekozala liyangani monene kuna, na ntembe te. Pe nayokaki kati na mibu ebele ete Nkolo alingi ete nazonga. Mwa mosala, na komikitisa, ya komikitisa oyo Apesi ngai, nakanisi ete Asilisi naino mpenza na yango te, kuna. Emonani lokola ete moto moko akoki kozala esika moko boye oyo nakoki kokanga na monyama ya Nsango Malamau, oyo Apesa ngai mpo na kolobo bato, na nzela ya kobikisama na nzoto kouta na Nzambe, kobondela mpo na babeli. Solo nazali kosenga mabondeli na bino, bino baoyo bozali awa pe baoyo bazali kolanda na radio.

⁵ Sikawa nazali na ntango te ya kokamata bobele likomi pe koteya yango, yango nde nazali kozela nsima ya mwa miniti awa na—na . . . eyanganelo oyo, kasi nde ya kosolola na—na bino

mwa ntango moke, mpo toyebana. Pe na bato oyo bazali kati na mboka, nakobondela mpo na bango, sikasikawa, pe mpo na baoyo bazali awa. Boye nazali solo na esengo ya kokutana na baninga malamunyonso oyo ya sika oyo naino nakutana na bango te, baoyo nauti kokutana na bango bobele na ntongo oyo.

⁶ Tozali kolekisa bantango malamunyonso na mayangani bisika na bisika. Nazali lisusu kobima mingi mpenza te, mosala ezali mingi. Tozali kosala mibembo mingi kati na Jeffersonville, Indiana pe Tucson, Arizona, epai tokomi kofanda eleki mwa mibu, yengebene na emononeli ya Nkolo, oyo etindaki pe biso kuna, kozanga koyeba esika nazalaki kokende. Pe mingi kati na bino awa, na Clifton, nalobelaki bino mwa moke liboso ete nakende, pe liyangani ya Phoenix, na ntina na emononeli oyo namonaki. Namonaki lisanga ya Banje nsambo.

⁷ Pe nayebi, epai na balandi na radio, mbala mosusu mingi kati na bino bandimaka mobimba ya Nsango Malamunyonso te, pe yango ekoki kozala lokola mwa likambo ya kokamwa mpo na bino. Oyo, ekokaki pe kozala bongo mpo na ngai, kasi ezali . . . Soki moto moko akoki kolimbola likambo moko boye, osengeli lisusu te koyamba yango na nzela na kondima. Ezali makambo oyo tokoki kolimbola te, ezali oyo tosengeli koyamba na nzela na kondima. Tokoki kolimbola Nzambe te. Moto moko te akoki kolimbola Nzambe. Azali na bokonzi suka te, pe Azali monene pe na nguya. Tozali bobele—tozali bobele koyamba yango mpo ete toyebi ete Azali. Pe na nzela na kondima na biso, na koyambáká yango, Azali kozongisela biso eyano, libatisi ya Molimo Mosantu.

⁸ Yango nde, nakolobela bino sikawa, na mwa ntango moke awa, likolo na: “Lolenge na Nzambe, to esika ya kosambela.” Pe esika bobele moko oyo okoki kosambela Ye, esika bobele moko oyo Akoki kokutana na yo, esengeli . . . Kati na nyonso, Lingomba ezali se moko, esika se moko, ntango se moko, libota se moko, oyo Nzambe azali kokutana na bango. Pe nazali kolikia ete Nkolo akopambola Nsango oyo epesami mpo na mitema na bino baoyo bozuami awa.

⁹ Sikawa, kokoma na ngai na Tucson, ezalaki ndenge, na bimononeli oyo ezali kolobela yo na Nkombo na Nkolo. Ata moko te kati na yango, ndenge nakoki komikanisela, bokoki kotuna moto ata pe nani soki bakoki komikanisela ntango moko boye, oyo Asila mpenza koloba likambo moko boye bongo ezanga kozala Solo. Ekokisamaka ntango nyonso bobele na motindo oyo Ye alobi ete ekokokisama.

¹⁰ Pe yengebene na Makomi, Asengeli kozonga epai na biso na mikolo oyo ya suka, na mosala ya lolenge oyo. Yango ekosalema nsima na libatisi ya Molimo, koloba minoko ya sika, lobiko na nzoto kouta na Nzambe, pe bongo na bongo, makambo nyonso wana. Kosukisama ya nsango ya ba-Pentekotiste, yango nde tozali kolobela lelo. Mosala oyo ya Klisto Ye moko ezui nzoto kati

na bato na Ye, na makambo yango moko mpenza oyo Asáláká ntango Azaláká awa na mabele; kati na Nzoto na Ye, Mwasi na libala, oyo azali eteni na Ye, oyo azali kosala makambo yango moko, lokola Mwasi na Mobali, to Mokonzi na Mwasi na Ye, mpenzampenza liboso ya molulu ya Libala.

¹¹ Na póso oyo, soko Nkolo alingi, nalingi koloba moke likolo na yango, na liyangani na biso ya kopalanganisa Nsango awa, na—na Hotel Embassy, pe komesenisa bato mwa moke na esaleli na ngai ya komikitisa. Nta—ntango pe ngonga oyo tozali kobikela, soki moto ayebi te nzela nini alanda, nini asala te ndenge nini abaluka, ozali—ozali lisusu kotambola na kondima te; ozali bobele kokanisa, ozali kobanza. Pe *kobanza* ezali “ko—kokende liboso kozanga bondimi ya solo.” Bongo soki tozali na bondimi ya solosolo te mpo na koyeba oyo Nzambe alobaki ete ekosalema na ngonga oyo, tokosala ndenge nini mpo na kotelemela ntango yango? Pe tosengeli kokutana na yango, koyebaka, na nzela na kondima kati na Liloba na Ye, makambo oyo esengeli kosalema sikawa; pe lolenge ya bikólo, lolenge ya bato, lolenge ya lingomba pe bongo na bongo.

¹² Tosengeli koyeba yango, pe na nsima koyeba ndenge nini kokende kokutana na yango. Soki oyebi ndenge ya kosala yango te, ozali bobele—bobele oyo tomesanaki kobenga, lokola komeka mozindo na mosapi; komibwaka mbala moko na kati, na elikia ete likambo ekosalema, kolikia *oyo* pe kolikia *oyo kuna*, pe “ekosalema?” Kasi Nzambe alingi te ete tosala bongo. Alingi ete toyeba oyo Ye alobaki mpo na lelo, na nsima kokutana na yango na nzela na kondima, mpo ete Alobaki ete ekozala bongo. Bongo na ntango wana nde to—tokoyeba ete ozali kati na Solo mpo ete ozui maloba ya moto moko boye te na esika na yango; ozui Liloba na Ye mpo na oyo tosengeli kosala. Pe tozali kolikia ete Tata na biso oyo azali na Likolo ako—akopesa biso yango na póso oyo.

¹³ Sikawa, bolimbisa ngai ndenge nakataki, lisolo oyo nazalaki koloba eleki mwa ntango moke, na ntina na bokomi na Tucson. Bongo nakanisaki, ngai moko, ete ezalaki suka ya bomoi na ngai. Nakanisaki ete moto moko te akokaki koyikela mpiko lokito ya lolenge wana oyo esalemaki kati na emononeli wana na ntongo wana, pene na ngonga ya zomi epai na biso, bongo akoka kobika nsima na yango. Ee, nakomaki na Tucson, toyokanaki na mwana na ngai ya mobali, mpo ete mwasi na ngai na—na bana baya elongo na ye wana esilaki ngai kokende, mpo ete nakanisaki ete ezalaki suka na ngai. Pe ngai, na Phoenix pe ebele na mayangani liboso ete yango esalema, nayebisaki bino mpenzampenza ndenge nini elingaki kosalema.

¹⁴ Boye, mwa basanza nsima na yango, nazalaki na Sabino Canyon mokolo moko na ntongo, oyo ezuami mpenza epai na likolo na Tucson. Nazalaki kuna mpo na kobondela. Bongo, wana ezalaki ngai kobondela, natombolaki loboko likolo, nazalaki koloba: “Tata, nasengi na Yo ete okoka kosunga ngai

na motindo moko to mosusu, pesa ngai makasi, mpo na ntango oyo ezali liboso na ngai sikawa. Pe soki mosala na ngai esili awa na nse, na bongo nasengeli koya epai na Yo. Pe ezali te ete nazali na mawa mpo na koya, kasi nayebi ete Okobatela libota na ngai. Pe na—nazali bobele kosenga makasi mpo na ntango oyo.” Bongo eloko moko etutaki loboko na ngai!

¹⁵ Sikawa, balandi na radio, oyo nauti koloba ekoki komonana ndenge, kasi ezali solo. Pe Nzambe nde Mosambisi na ngai.

¹⁶ Natalaki na loboko na ngai boye, namonaki mopanga, esimbelo na yango ezalaki na ezipelo. Bongo esimbelo yango moko esalemaki na mangiliti, pe emonanaki mpenza lokola ete esimbelo na yango ebatelamaki na eloko moko lokola wolo. Pe mbe—mbeli yango moko ezalaki komonana nde lokola ezalaki kongala, oo, eloko moko lokola ebende ya mpembe to eloko moko oyo ezalaki kongenga na moi.

¹⁷ Bongo, ezalaki pene na ngonga ya zomi to ya zomi na moko na ntongo, kuna na likolo ya ngomba. Okoki komikanisela ndenge nini moto (lokola ngai boye, nazali komiyoka ete motó na ngai ezali kosala malamumu) akoki komiyoka, eteleme ye wana na mopanga oyo euti soki wapi, mosika mpenza na bato, asimbi yango na loboko. Nasimbaki yango mpenza, nakamataki yango pe napepaki mbeli na yango ngambo na ngambo, pe, ee, ezalaki mpenza mopanga.

¹⁸ Bongo, natalaki zongazonga. Nalobaki: “Ee, sikawa, esalemi ndenge nini? Ngai oyo natelemi awa, mpenza, awa, pe moto moko te azali awa, bazali mosika mpenza, bongo yango euti wapi?” Pe nalobaki: “Ee, na—nabanzi ete ekoki kozala nde—nde Nkolo azali koyebisa ngai ete ntango na ngai ekomi na suka.”

Bongo Mongongo moko eyokanaki pe elobaki: “Oyo ezali Mopanga ya Nkolo.”

¹⁹ Pe nakanisaki: “Ee, mopanga, na bongo, ntina na yango ezali, ndenge esalemaka epai na mokonzi, kopesa ebundeli epai na mobuti mpunda.” Boyebi, ndenge ezalaki kosalema na Angleterre pe bikolo ndenge na ndenge. Nakanisaki: “Yango nde ntina na yango, kopesa ebundeli epai na mobuti mpunda.” Pe nakanisaki: “Ee, mbala mosusu esengeli ete natiela bato maboko, to . . .” Natalaki na lolenge nyonso ya . . . Makanisi ya moto ekoki kozala na mobulu, boyebi. Kozanga ete oyeba. Makanisi na biso ezali na ndelo; oyo ya Ye ezali na ndelo te. Na bongo, pe lokola nazalaki, yango . . . Na bongo elongwaki na loboko na ngai pe nayebaki epai ekendeki te, elimwaki pwasa. Ee, soki ezalaki moto oyo azalaki na lisosoli ata moke te ya makambo ya molimo, o—okoki kobela liboma kaka boye. Okozala wana, komituna likambo nini esalemi.

²⁰ Pe Alobaki: “Emononeli yango ezali suka ya ntango na yo te. Ezali mpo na mosala na yo. Mopanga yango nde Liloba. Bilembo Nsambo ekokangolama, mabombami ya . . .”

²¹ Na bongo póso mibale nsima na yango, to kutu sanza mibale, nsima na yango, nazalaki na ngomba elongo na lisanga ya baninga ntango yango esalemaki. Banje nsambo, polele mpenza ndenge bozali boye, bakitaki na mbangu kouta na Lola. Mabanga elongwaki na bangomba pe ekitaki na nse, pe—pe bato oyo bazalaki wana bazalaki koganga pe kokamwa, boyebi, pe putulu emataki bisika nyonso. Pe ntango esalemaki, Alobaki: “Zonga epai na yo. Sikawa ekosalema, Mwanje moko na moko akozala elembo ya Bilembo Nsambo.”

²² Yango, ezali na bande. Pe buku yango ekobima na mwa ntango moke, mpo sikawa bazali, toloba, kogramarizé yango. Ndenge boyebi yango, grammaire na ngai ezali malamumu mpenza te, pe bato bakolinga te. . . Bosengeli mpenza kozala bato oyo balingi ngai pe bayebi ndenge nini kososola ngai na grammaire na ngai. Kasi moto na likindo moko azali kogramarizé yango mpo na ngai, azali kolongola nyonso ya—ya. . . Malamumu, mbala mosusu nalobi liloba oyo ebongi te. Nayebi ata te. Na bongo, nayoki moto moko koseka, boye nabanzi “kogramarizé” elongobanaki te. Kasi lokola moto ya Hollande wana alobaki, solo, bososola nde oyo nalingi koloba kasi oyo nalobi te.

²³ Pe, etikali bobele miniti misato mpamba, bayebisi ngai, mpo na kosilisa emisio oyo.

²⁴ Sikawa, bino balingami balandi na radio, pe bino baoyo bozali kobela pe bozali na bosenga awa na kati na eyanganelo, bokoki kotiana maboko moko na mosusu na ntango oyo tozali kobondela moke mpo na babeli. Sikawa, Yesu, na etinda na Ye ya suka epai na Lingomba, alobaki: “Bilembo oyo ekobila bango bakondima.” “Bango,” bango bakondima! “Soki batii maboko na babeli, bakobika.”

²⁵ Molingami Tata na Lola, tozali lokola bana lelo, tozali kotosa oyo Yo olobaki ete tosala. Tozali kotia maboko likolo na malombo nyonso oyo tozui na nzela ya telefone. Ozali komona bango kuna, na mboka mobimba, ndenge bazali na bosenga, baoyo bazali konyokwama. Ozali komona baoyo bazali awa oyo bazali na bosenga, konyokwama. Bongo tozali kopesa bango epai na Yo, Nzambe Molingami, na kondima oyo, kati na Liloba na Yo oyo Olobaki: “Bilembo oyo ekobila bango bakondima. Soki batii maboko likolo na babeli, bakobika.” Kokisa yango, Nkolo, na Nkombo na Yesu Klisto. Amen. [Maloba mazangi na eteni oyo ya bande—N.D.E.]

[Ndeko Branham asilisi emisio ya liboso na radio—N.D.E.]

☆☆☆☆☆☆

²⁶ Natondi yo, Ndeko Shakarian. Ezali mpenza litomba monene kozala lisusu awa na emisio, mpo na koloba na baninga na biso balandi na radio, lokola pe baoyo bazali awa.

²⁷ Pe tozali solo kokomisa mbela oyo epai na bino, ete boya na Hotel Embassy lobi nsima na nzanga, mpo babondela mpo

na bino. Pe bobele yango te, kasi komema basumuki pe baoyo bazóngá nsima. Soki tozali bobele kobondela mpo na babeli, pe tozali mpenza komona Nzambe kosala ntango nyonso bikamwa minene, kasi yango ezali likambo ya liboso te. Likambo ya liboso ezali nde kobikisama, kotondisama na Molimo na Nzambe, oyo na kolobela bino bobele na mwa ntango moke awa, pe kosepela oyo eyaka na ndenge tosengeli kotondisama na Molimo na Nzambe.

²⁸ Na momeseno lobiko na nzoto kouta na Nzambe ebendaka bokebi ya bato, pe ememaka bango Liboso na Nzambe. Ntango Nzambe asalaka likambo moko boye oyo—oyo bayebi ete e... ee, esosolamaka te. Tokoki te na pwasa kotalisa ndenge nini yango esalemaka. Nzambe nde asalaka yango na lolenge na Ye Moko ya kokamwa. Na nsima ezali kobenda bokebi ya bato, mpo bayeba ete Nguya moko Ezali na esika moko boye, oyo ekoki kosala likambo moko oyo eleki lisosoli ya bomoto, pe oyo esalaka ete batala epai na Mwana na Mpate ya Nzambe. Pe ntango nyonso lobiko na nzoto kouta na Nzambe; bayebisaki ngai, pe nandimi, ngai moko, ete penepene na ntuku motoba to ntuku nsambo likolo na mokama, mbala mosusu, ya mosala ya Nkolo na biso, ezalaki na ntina na lobiko na nzoto kouta na Nzambe. Pe Azalaki kosala yango mpo na kobenda bato. Bongo ntango bazalaki kokoma wana, Azalaki koloba: “Soki bokondima te ete Ngai Nazali oyo ezali Ngai, bokokufa na lisumu na bino.”

²⁹ Sikawa, lobiko na nzoto kouta na Nzambe ezali mpambo monene mpo na kobenda, mpo na komema bato ete batala epai na Nkolo Yesu. Pe Molakisi F. F. Bosworth, oyo azalaki moninga ya mingi kati na bino, pe boyebaki ye, pe mosala na ye ezalaki na ntina mingi mpo na ngai ntango nazalaki elenge motei. Nabandaki mayangani na ngai, pe nakutanaki na Ndeko Bosworth. Amesanaki koloba: “Lobiko na nzoto kouta na Nzambe,” ezali bongo mwa maloba moko makasi, alobaki: “Lobiko na nzoto kouta na Nzambe ezali mpambo likolo na ndobo.” Alobaki: “Batalisaka mbisi ndobo soki moke te. Batalisaka ye mpambo, pe na bongo akolanda mpambo pe akokangama na ndobo.” Na bongo yango nde tozali komeka kosala. Yango nde...to... Ntina tozali kolanda ezali ete tomema bato epai na Nkolo Yesu Klisto. Pe Azali motindo moko lobi, lelo, pe libela na libela. Na bongo soki Azalaki Mobikisi na nzoto kalakala, Azali pe Mobikisi na nzoto lelo.

³⁰ Napesa naino litatoli na ngai moko liboso nabondela mpo na babeli oyo bazali kolanda na radio. Eleki mwa mikolo, nazalaki kuna likolo na ngomba epai wapi likambo moko ya monene esalemaki liboso na bandeko zomi na mitano to ntuku mibale, epai Mwanje na Yawe akitaki na nse mpenza, na Pole monene kokende mbangu lokola monzoto, mabanga kopasuka epai na epai ya bangomba, pe mabanga ezalaki kopumbwa na ntaka ya pied nkama mibale [61 mètres—N.D.T.], to koleka, ngambo na

ngambo, ezalaki kokata-kata songe ya banzete. Pe natelemaki mpenza na nse na Yango. Pe nayebisaki bango yango mwa basanza liboso ete esalema, ete ekokokisama pe nini ekosalema; solo mpenza, elobamaki mokolo moko liboso. Pe bato nyonso oyo bakimaki mbangu komibomba na nse ya mituka pe nyonso wana, bazalaki komeka kokima. Bayebaki te likambo nini esalemaki. Bongo Alobaki pe ayebisaki oyo ekosalema mpenza mbala moko nsima na yango.

³¹ Nafandaki likolo ya libanga moko boye kuna, mpenza-mpenza esika oyo Ye amonanaki, nazalaki na—na moninga moko oyo azalaki na biso, oyo autaki kuna na Minnesota. Bandeko na ye bazali awa na ntongo ya lelo pe nandimi te kasi akoki kozala awa na moko na ba-etáje mosusu. Ezalaki Donavon Weerts, pe azali elenge moko malamú, mondimi ya Missioni oyo autaki kopesa bomoi na ye na Klisto pe autaki kotondisama na Molimo. Elenge mobali ya Allemagne, na komikitisa mingi, azali penepene na mibu ntuku misato, azali na libota, bana mike mibale to misato. Ayaki kofanda na Tucson bobele mpo bákóma bazalani na ngai, epai bato nkama misato to minei bayaki kofanda mpo bazala bazalani. Na bongo a . . .

³² Pe nazali na esengo ya kozala na bazalani ya bongo. Bazali kolanda ngai bisika nyonso kino na Afrika ya Sudi, pe na mokili mobimba, bobele mpo na kozala pembeni pe komona . . . Na ngai, pe mpo na kozala na ngai pe kosepela na bisengo ya Nkolo.

Moto na komikitisa ya boye, namonaki ye naino mpenza te.

³³ Ya solo, bato oyo nayebi pe nasanganaka na bango bazali mpenza lokola bandeko na ngai ya mibali pe ya basi. Nakengelaka bango, pe nayokaka soki nakanisi ete bazali kobima na molongo, boye nakobenda bango pembeni pe nakosolola na bango, mpamba te nalingi bango. Tolingi kozala na Nkembo elongo. Pe ntango mosusu ekoki kosalema, kati na mayangani, bokoki kokanisa ete nalobelaka bino makasi. Euti na yango te. Ezali te mpo ete nalingi bino te, kasi eutaka mpenza na motema na ngai, mpamba te na—na . . . Esengeli bobele kozala na nzela moko. Nzela ezali bobele moko mpo na kosalela Nzambe, pe ezali nde . . . Pe tosengeli kotikala kati na nzela na Ye, ata soki makanisi na biso ezali nini. Nzela na Ye nde!

³⁴ Bongo namonaki Donavon, na songe ya litoyi na ye ya mobali, evimbaki penepene mbala misato koleka monene na yango, pe ezalaki komonana motane mpenza. Ee, nazalaki kokanisa mbala mosusu ete, lokola autaki kozala na eliki mwa mikolo, esika tokendáká, ntango mosusu nzube moko etubaki ye na litoyi. Kasi, ntango na kamataki loboko na ye, namonaki ete ezalaki nde kanser. Na bongo nalobaki na Donavon, nalobaki: “Donavon, ozali na . . . Ntango boni yango eumeli na litoi na yo?” Se mpo nameka komema makanisi na ye pembeni, lokola

nde nayebaki te. Nalobaki: “Ntango boni yango eumeli wana, Donavon?”

Alobaki: “Ndeko Branham, pene na sanza motoba,” alobaki bongo.

Nalobaki: “Mpo na nini oyebisaki ngai te?”

³⁵ Alobaki: “Oo, lokola nazalaki komona ete ozalaki mpenza na mosala mingi,” alobaki, “nalingaki ko—koyebisa yo yango te.” Alobaki: “Nakanisaki bobele ete mbala mosusu Nkolo akokaki koyebisa yo mokolo moko.”

Na bongo nalobaki: “Oyebi oyo yango ezali?”

Alobaki: “Nayebi yango malamumu.”

Nalobaki: “Ezali bongo.”

³⁶ Pe tokomaki na ntongo oyo elandaki. Eloko mosusu te, ntango nasimbaki ye na loboko; na ntongo oyo elandaki, ata elembo moko etikalaki na litoyi na elenge mobali yango te. Elimwaki mobimba.

³⁷ Bongo mbala mingi towelaka mpo na kokoma na likambo *oyo to oyo kuna*. To . . . Bomoni, ezali nde: “Bilembo oyo ekobila mondimi.” Elobi te “soki babondeli mpo na babeli.” “Soki batii maboko na babeli, bakobika!” Tosengeli kozala na kondima, biso moko, na oyo tozali kosala. Malamumu.

³⁸ Bongo sikawa Donavon akoki kozala awa. Bokokutana na ye. Akozala awa, soki azali awa te na ntongo oyo, na moko na batéje oyo mosusu. Bokokutana na ye, pe ayebi litatoli yango.

³⁹ Nakoki lisusu koloba nini? Nabanzi ezali Luka, to Yoane, moko na bango, alobaki ete mokili ekokoka te ko- . . . komema, kosimba babuku oyo ekoki kokomama na ntina na oyo Asali kati na bato na ntango oyo ya suka; ndenge babeli babiki, balangwi masanga bakangolami, bankoto na bankoto, pe makono pe minyoko ya ndenge na ndenge.

⁴⁰ Sikawa, bino baoyo bozali kolanda na radio, pelamoko baoyo bazali awa, loboko na ngai etondi na malombo oyo ekomeli biso na ntongo ya lelo na nzela ya telefone, oyo ezali ntango nyonso kolela uta tokomaki awa. Na bongo to . . . Malombo mokama na ntuku libwa na motoba ekomeli biso na ntongo ya lelo, na nzela ya telefone, uta tokotaki awa. Na bongo tika ete tosangana kati na libondeli sikawa na ntango oyo moko na moko . . . Ata soki bozali wapi, na mboka mobimba, botiana maboko moko likolo na mosusu, soki bozali bandimi. Soko te, tia loboko na yo likolo na Biblia to eloko moko boye oyo ezuami wana, na ntango oyo tozali kobondela bisika na bisika.

⁴¹ Molingami Tata na Lola, mwa litatoli oyo ya Donavon Weerts, bobele moko kati na bankoto, Nkolo, oyo na ngolu na Yo monene . . . Nabondeli ete okitisa miso kati na mitema ya bato oyo bazali awa pe ya balandi na radio. Pe tika ete bango

nyonso babikisama. Tika ete oyo ya mayele mabe atika bango, pe tika ete bakangolama na minyoko na bango nyonso. Pesa yango, Tata. Na Nkombo na Yesu Klisto, Mwana na Yo, tosengi yango. Amen. “*Natondi Yo, Nkolo . . .*” [Maloba mazangi na eteni oyo ya bande—N.D.E.]

[Ndeko Branham asilisi emisio ya mibale na radio—N.D.E.]

☆☆☆☆☆☆

⁴² Malamu, oyo ezali mbala na ngai ya misato ya kozala awa na ntongo ya lelo. Ólalá! Pe, boyebi, bauti koyebisa biso ete tosengeli kobima na esika oyo nsima na miniti pene na zomi na mibale, zomi na minei, to bongo. Pe moyangeli oyo azali na etáje mosusu kuna, alobaki ete bakoki kopesa bilei mosusu te. Bolei na biso ezui ntango molai. Tozalaki na bilubu ebele, boyebi. Na bongo tosepeli mingi, mingi na ndenge tosali yubilé monene oyo ya bilei kitoko, ya molimo, ndenge nakoki kobenga yango, na ntongo ya lelo awa elongo na etonga oyo ya bato malamu.

⁴³ Nalingi ko-koloba ete tozali . . . mayangani mosusu, lobi nsima na nzanga, kuna na Embassy. Boye, tokobondela mpo na babeli kuna, pe tozali kolikia ete Nzambe akozala na biso. Pe naye mpo na kopesa eteni oyo ya ngai, mosala na ngai, kosala (nyonso oyo tokoki kosala) ete liyangani oyo ezala elónge. Elónge te mpo ete ezali mayangani na biso, kasi elónge ya bato oyo bazali kokutana na Yesu Klisto. Yango wana nde elónge. Na mayangani nyonso, etali te boni tozali kokumisa Nzambe, makambo minene boni tomoni Ye kosala, mbala boni Azali koloba na biso na Molimo, pe bongo na bongo; bebele ete eloko moko ekokisama, ndambo na milimo ekotisama na Bokonzi!

⁴⁴ Pe Ndeko Shakerian auti koloba bebele sikawa ma-maloba ya solo, bebele sikawa likolo na oyo azalaki kokanisa na ntina na ntango oyo tozali—tozali kobika kati na yango. Nandimi yango solo mpenza na motema na ngai mobimba ete tozali kobika mpenza na ntango ya suka, mpenza na—mpenza na molili ya mpokwa. Ntango ekomi mosika. Pe ntango tozali komona makambo kosalema ndenge ezali kosalema lelo, ee, ezali mpasi mpo na koyeba likambo oyo ekozala na ekeke mosusu. Eleki mwa mikolo . . .

⁴⁵ Nakoyebisa bino mwa likambo oyo mingi bayebi te. Bayekolaki likambo moko na Arizona mobimba, epai nafandaka, na biteyelo nyonso. Bapesaki bana momekano ya mayele, kozanga ete bana bango moko bayeba. Pe boyebi? Esangisaki biteyelo ya mibale pe—pe biteyelo ya liboso, bana ntuku mwambe likolo na mokama bazalaki na mayele oyo ekoki te. Ntuku nsambo likolo na mokama kati na bango bazalaki batali television. Bomoni, milimo mabe, emikotisi kati na biso pe toyebi te . . . Bokoki komituna mpo na nini ezali kosalema. Bozali koyoka Mongongo na Nzambe koganga kotelemela yango, nzoka nde to—tozali komona ete tokangami kati na yango.

⁴⁶ Nakoyebisa bino likambo moko oyo ekopesa mpasi. Bomoni, “Ezali te baoyo nyonso balobaka na Ngai: ‘Nkolo, Nkolo,’ nde bakokota; kasi ye oyo akosalaka mokano na Tata na Ngai.” Mokano na Ye nde Liloba na Ye. Ata boni tokoki kozala basambeli, kolekisa ntango malamumu, koganga, kopumbwa, kati na mayangani oyo, oyo tozali. . . Na—nalingi koloba mabe te. Kasi nazali na—na mokumba ya kokokisa epai na Nzambe, pe mokumba yango ezali ete nazala sembo pe naloba oyo Ye alingi ete naloba. Pe nazali—nazali mpenza kozongisa matondi mpo na mayangani oyo ya Californie oyo bayikeli ngai mpiko na—na bondimi na ngai. Soki nazali kotalisa bondimi na ngai polele te, nazali mokosi pe na bongo nazali ata sembo te epai na bino. Bongo soki nakoki kozala sembo te epai na bino, ndenge nini nakozala sembo epai na Nzambe, mpamba te ngai namonaka nde bino pe nasololaka nde na bino. Na ntembe te, tosololaka pe na Nzambe, kasi tosengeli mpenza kozala na eyongi pe sembo bamoko epai na bamosusu. Tozali solo mpenza kati na—na eleko moko ya nsomo, ya nsomo. Pe bosila kotelema. . .

⁴⁷ Tika naino nayebisa bino mwa likambo oyo nayekoli. “Ezali te baoyo nyonso balobaka na Ngai: ‘Nkolo, Nkolo,’ nde bakokota kuna; kasi ye oyo akosalaka mokano ya Tata na Ngai.” Yesu alobaki, awa na mokili: “Moto akobika bobele na lipa te nde na maloba nyonso.” Maloba nyonso! Bobele Liloba moko na ntango moko boye te, kasi na Maloba nyonso.

⁴⁸ Ezalaki Liloba moko mpamba oyo etiamaki ntembe, na oyo ya Nzambe. . . kati na mibeko na Nzambe, nde ememaki kufa, mawa, makono nyonso pe mpasi nyonso ya mitema, kozanga Liloba na Nzambe, Liloba moko mpamba! Soko amemaki libota ya bato na liwa, na kozanga, na kotia ntembe na Liloba moko mpamba, “solo,” solo. Kasi Ye alobaki ete ekosalema. Satana alobaki: “Solo ekosalema te.” Kasi esalemaki.

⁴⁹ Na bongo, tosengeli kotosa Maloba nyonso ya Nzambe. Soki bato pe mpasi oyo nyonso pe makambo oyo ekómelaki libota na bato, na kolimbolaka mabe, to—to na kotiaka ntembe na Liloba moko mpamba, ndenge nini tokozonga na kozanga Liloba moko, soki yango esengaki kofuta ntalo nyonso oyo, ata bomoi ya Mwana na Ye?

. . . *mingi babiangami, . . . motuya moke baponami.*

. . . *mingi babiangami, . . . motuya moke baponami.*

⁵⁰ Nakoki te kozua motó na liteya uta na oyo, kasi mpo ete tozali na ntango te, kasi bobele mpo natikela bino eloko moko. Tokanisa na. . .

⁵¹ Nakendaki mokolo moko na Ndeko Shakarian, esika bazalaki kosangisa mimboto ya bibwele. Bongo namonaki mo—mo. . . na laboratoire epai Ndeko Shakarian amemaki ngai. Bongo bazindisaki kati na mai ya ngombe mobali, kaka mwa. . . lokola mwa esaleli moko, lokola nzete ya aliméti, pe batókákí

ndambo ya mai yango, pe batiaki yango na nse ya talatala oyo eyesiaki yango monene mbala nkama na nkama. Bongo mimboto ya mike ezalaki kopumbwa-pumbwa kati na yango, kati na mai yango. Mpo, toyebi ete momboto eutaka epai na mobali, pe liki epai na mwasi. Pe natunaki Shimiste wana, nalobaki: “Nini wana ezali komeka kopumbwa-pumbwa boye?”

Alobaki: “Ezali—ezali bangombe mibali ya mikemike pe bana na ngombe.” Omoni?

Bongo nalobaki: “Kati na mwa litanga wana?”

Alobaki: “Iyo.”

⁵² Nalobaki: “Boye mbala mosusu kati na mai nyonso oyo ya mobali bakoki kozala milio?”

Alobaki: “Oo, iyo.” Bomoni? Sikawa, botala malamau.

⁵³ Na bongo, ntango likambo monene oyo esalemaka, liki ezalaka bobele moko oyo ezalaka momboto bobele moko kati na milio yango. Pe ata moto moko te akoki koyeba soki momboto yango ezali oyo wapi, to soki liki yango ezali oyo wapi. Soki otali malamau mbotama ya bato, ezali libombami monene koleka . . . koleka mbotama na nzela na mongondo. Mpamba te, kati na mai ya mobali, moko mpamba kati na yango, nde eponama liboso mpo na kozala na bomoi, pe nyonso oyo etikali ekokufa. Pe ezali oyo ya liboso oyo ekokutana na yango te; ezali nde oyo ya liboso oyo ekosangana na liki. Mbala mosusu liki ekoki kouta na suka ya mai ya mobali, to na katikati ya mai ya mobali; ekoki pe kosalema bongo mpo na momboto, liki. Ntango momboto emibendi kino na kati ya liki, mwa mokondo na yango elongwe, pe mokuwa ya mokongo ebandi kosalema wana. Bobele moko mpamba kati na liboke wana mobimba ya milio, nde ekolonga, bobele moko mpamba; pe yango etangama na Ngya moko, oyo bato bayebi te. Nzoka nde, bino nyonso, bozali ndenge moko, mimboto yango nyonso ezali mpenza ndenge moko. Motindo moko mpo na banyama. Motindo moko mpo na bato. Etangama soki ekozala mwana mobali, ya mwasi, na suki motane, na suki moindo, to nini. Etangama na Nzambe. Soki otali na miso, yango nyonso ezali ndenge moko, na lolenge esalema, kasi moko mpamba kati na yango nde eponamá mpo na bomoi; moko kati na milio, nzoka nde nyonso ezali ndenge moko.

⁵⁴ Tango Yisalaele babimaki na Ezipito, penepene na bato milio mibale babimaki na mbala moko. Bango nyonso bayokaki nsango ya mosakoli. Bango nyonso bamonaki Likonzi na Móto. Bango nyonso babatisamaki na Mose, kati na Mbu Motane. Bango nyonso bagangaki na—na Molimo, babetaki ndundu pe bazalaki kokima-kima na libongo, elongo na Miriam, wana ezalaki Mose koyemba na Molimo. Bango nyonso, bamelaki mai oyo ebimaki na Libanga yango moko ya molimo. Bango nyonso, baliaki Mana ya sika mpokwa nyonso. Bango nyonso! Kasi mibale mpamba nde bakomaki na mboka, moko kati na milio.

⁵⁵ Momekano ezalaki nini? Bango nyonso bamelaki na Libanga yango moko, bango nyonso baliaki Mana ya molimo yango moko lokola oyo tozali kolia na ntongo oyo, kasi momekano ya Liloba etalisaki bango polele. Wana ekomaki bango na ntango ya Kades Barnea, ntango babandaki kokatisa ngambo mpo na kokota na mboka na elaka, bakokaki kokatisa te liboso ete bamekama na nzela na Liloba. Pe bango nyonso zo—zomi oyo mosusu bazongaki, pe balobaki: “Tokokoka te! Bato yango bazali lokola... Tozali lokola mayoyo, liboso na bango, na engumba na bango monene ezingami na lopango. Banguna baleki makasi.”

⁵⁶ Kasi Yosua na Kalebe bakitisaki bato mitema. Balobaki: “Tozali na makoki koleka mpo na kolonga!” Mpo na nini? Liboso balongwa na mboka na elaka, Nzambe alobaki: “Napesi bino mboka yango. Napesi yango epai na bino. Ezali ya bino.” Kasi moto azalaki bobele moko kati na milio moko na moko.

⁵⁷ Penepene na bato milio nkama mitano bazali Baklisto ya nkombo lelo kati na mokili, pe mokolo moko na moko ezali kosukisa ekeke moko. Bongo sikawa, soki konetolama esalemi lelo pe soki bato nkama mitano, na mokili mobimba, banetolami? Bakoyeba soko moke te, to bakomona yango ata na zolonale te, na ntina na baoyo bakei. Pe Boyei na Nkolo ezali Boyei ya sekele. Akoya kokamata bato lokola moyibi. Ekozala bato moke mpenza, na lolenge ete. . .

⁵⁸ Ndenge moko mpenza na ntango oyo bayekoli batunaki Yesu: “Mpo na nini Bakomeli bazali koloba ete—ete ekoki ete Eliya aya liboso?”

Alobaki : “Asili koya, nde boyebaki yango te.”

⁵⁹ Bosila kokanisa oyo bato basalaki? Bakobaki bobele kondima ete Mo-. . .ete Elia azalaki koya. Nzoka nde azalaki mpenza kati na bango, kasi bayebaki yango te.

⁶⁰ Ekozala pe bongo na Boyei ya Mwana na móto! Bakosala na Ye ndenge moko mpenza. Molimo na Nzambe ezali awa. Ee, tokosala na Yango nini? Tokolia Mana, pe bongo na bongo, kozanga ete tokoba kokende liboso lokola pe tozali kokoma ebele?

⁶¹ Bosila kotala malamau nkona, ndenge Rev. Pitts azalaki koloba eleki mwa ntango moke, ndenge nkona ekundamaka na mabele? Nkona mingi ezali kuna na kati ya mabele. Ntango Nzambe azalaki kotambola likolo na mai, na Pole, pe Pole ebimaki. Bozali ya liboso ya Nzambe, Pole ya liboso oyo elobamaki eyaki na nzela na Liloba na Nzambe. Pe Liloba na Nzambe ezali eloko bobele moko oyo kino lelo ezali kobimisa Pole. Pe ntango mai ekitaki, nkona esilaki kotiamama na mabele, pe Pole esalaki bobele mosala ya kotoisa bankona oyo etikalaki na momboto kati na yango, etoyaki. Nzambe azalaki kokela bikelamu na Ye.

62 Na bongo, mokolo ya Pasika na ntongo, Pole mosusu ebetaki mabele, ntango Molimo Mosantu epesamaki. Epesamaki mpo na komema Pole epai na Bankona oyo Nzambe ayébáká, na nzela na Ye ya koyeba makambo liboso, ete balingaki kozala awa na mabele. Ndenge Ayebaki momboto ya liboso ya nzoto, Ayebi pe epai Momboto ya molimo ezali. Nzoto na yo ezuumaki awa na ntango wana mpenza, na mabele, ntango Nzambe akelaki mabele na ebandeli. Tozali eteni ya mabele. Tozuamaki kuna. Pe na nzela na Ye ya koyeba makambo liboso, Ayebaki mpenza nani alingaki kolinga Ye pe nani alingaki kosalela Ye, pe nani alingaki kosala bongo te. Boyebi na Ye ya makambo liboso eyebi yango. Soki te, na bongo Azali pe Nzambe te. Akoki kozala Nzambe te kozanga ete azanga suka. Pe soki Azangi suka, Ayebi makambo nyonso.

63 Na bongo, bomoni bato kosala bozoba na bango. Bazali kotuta libaku na yango. Bazali kowela yango, pe bazali kokanisa *boye* na *boye*, kasi ezali kotambola malamumu te, tozali komona yango. Kasi kotambola malamumu moko ezali, ezali nde kozua mokano na Nzambe oyo ebongi be pe kotelema kati na yango, oyo Nzambe abengaki yo na ntina na yango.

64 Ndenge Ndeko Jack alobaki eleki mwa ntango na ntina na esika oyo na—na Pershing Square, mobulungano nyonso oyo. Moko *boye*, pe mosusu lolenge oyo *kuna*; pe na oyo etali bato na likindo, pe bongo na bongo, ete soki olingi koyeba mwa likindo, okende kuna.

65 Nabanzi ete elingi kokokana mpenza na Hyde Park ya Londres. Nazalaki kuna, moto na moto azali na likanisi oyo ya ye. Ezali—ezali nde potopoto ya mokili ya mikolo oyo kati na Babilone.

66 Kasi bomonaki ntango—ntango Ndeko Pitts akobaki koteya biso liteya na ye kitoko na ntongo ya lelo? Ntango abandaki kobima na park, amonaki mwa felele ya lisi oyo ya Pasika. “Na katikati ya mobulungano nyonso oyo,” ndenge ateyaki biso yango, “ezalaki na nzela ya ‘kondima’ to ‘koboya’ te. Ezalaki bomoi moko ya Nzambe nde ezalaki kongenga kati na yango, na katikati ya mobulungano nyonso oyo.” Ezalaki wana, na bonzenga nyonso, mpo ete Nzambe nde akanaki ete ezala wana. Na katikati ya matata nyonso oyo, moto moko azalaki komona yango te. Bamonaki ntina na yango na molimo te.

67 Ezali pe bongo lelo na katikati ya mayangani, pe bitonga, mangomba pe bibongiseli na biso minene nyonso oyo, pe bongo na bongo. Moko azali kobenda na ngambo *oyo*, “Tosengeli kozala ba-Batiste, to kozala ba-Presbiterien, tosengeli kozala *oyo*, oyo *kuna* to oyo *mosusu*.” Na katikati ya nyonso wana, felele moko ezali kokola. Nguya na Nzambe ezali mpenza na katikati na biso, oyo ezali kokola na katikati na biso nyonso. Totelema mpo tomona yango naino mwa moke, pe totala yango malamumu

na píso oyo, mpo tomona yango kofungwama liboso na biso. Tondimi ete Nzambe akosala yango. Boye te? [Liyangani balobi: “Amen”—N.D.E]

⁶⁸ Namoni ete tosengelaki kozala na etáje ya nse na ntango oyo. Boye tobondela, moko na moko kati na biso.

⁶⁹ Nzambe Molingami, ntango togumbi mitó liboso na Yo, tozali komiyoka ete tolongobani te mpenza mpo na kosenga. Kasi Olakelaki biso ete soki toyeyi, Okoboya biso te. Bongo maloba makasi oyo euti kolobama, na mposa ata moke te ete ekoma mateyo, “moko kati na milio,” kasi bobele mpo ete tomikanisela mwa moke. Mpamba te Olobaki:

...ekuke ezali na nkaka, pe nzela ekangani, oyo ekoleka na bomoi, pe baoyo bakomona yango bazali mingi te.

Zambi mingi babiangami, nde motuya moke baponami.

⁷⁰ E Tata na Seko, tinda Pole ya Nsango Malamu na engumba oyo mobimba, na likita oyo ekozala na píso mobimba oyo ezali koya. Pe soki Momboto moko ezali, na motindo moko to mosusu na nzela na bolamu na Yo Moko oyo ya monene pe ya bwanya, lokola nauti komeka kotalisa yango na lolenge ya mai ya mobali pe ya mwasi, tika ete baya mingi na likita. Tika ete Molimo Mosantu apesa bango Pole. Tososoli ete ntango ekomi mbala mosusu mosika koleka ndenge tozali kokanisa. Tosengi na Yo, e Nzambe, ete ndenge tozali koya awa, tozali bobele kondima ete mbala mosusu eloko moko ezali awa oyo ekoki kosalema mpo na kosunga bato, to—to kokanga mpate yango ya suka. Toyebi ete ntango lopango ya bampate ekotonda, na bongo Mobateli na bampate akokanga ekuke.

⁷¹ Ndenge ezalaki na ntango na Noa, ntango moto ya suka na libota akotisamaki, Nzambe akangaki ekuke. Bongo babetaki pe batutaki, kasi ntango esilaki koleka. Nzambe Molingami, bazuaki libaku yango.

Olobaki: “Ngai nde Ekuke yango na lopango ya bampate.”

⁷² Pe boni loyembo oyo ya moyembi ezali kobeta motema: “Ntuku libwa na libwa ekoki te mpo na Yo? Kasi, te, etikalaki moko.” Akoki kozala mwa mpate ya moindo, to akoki kozala mwa moto mpamba, ekoki kozala oyo ya moke, ya mwasi to mobali. Toyebi esika bazali te, kasi oyo ya suka asengeli kokota, na nsima nde ekuke ekokangama. E Nzambe, Oyo oyebi makambo nyonso, lukaluka na bomoi na biso na ntongo ya lelo. Tinda biso bisika nyonso oyo tokoki kokende, mpo tokoka kozua mpate wana ya suka, ete ekuke ekangama pe Mobateli na bampate azuama na kati elongo na bampate. Kokisa yango, Nkolo. Soki mpate yango azali awa lelo, soki moto yango oyo asengeli kokota . . .

⁷³ “Bato nyonso oyo Tata apesi Ngai bakoya epai na Ngai. Pe moto akoki koya te, bobele soko Tata na Ngai abengi ye.”

⁷⁴ Soki moto moko ayoki mwa kobendama, to mwa koningana, ete oyo ekoki kozala ntango mpo na moto moko awa na kati ya liyangani oyo, awa to na etáje oyo ya nse, to esika nyonso bakoki kozala, tika ete bakoka koyanola: “Iyo, Nkolo, ngai nde mwa moyengi-yengi oyo akendeki mosika; pe oyo abundisaki Yango, na bomoi na ngai mobimba. Na—na—nayokaki ete nasengeli koya, kasi lelo nazuami na ngambo ya baoyo bazangi elonga. Nakoki komata to kukita te. Nakoki lisusu kokende epai mosusu te.” Oo, tika ete Mobateli monene na bampate aya, asembola maboko na ye ya bolingo pe akotisa ye na kobatelama nyonso, atia ye na mapeka na Ye pe azongisa ye na kobatelama nyonso.

⁷⁵ Mbala mosusu moko azali awa, Nkolo, na bokono, oyo azuami na likambo ya ndenge wana, na lolenge ete monganga alobi: “Likambo ya kosala ezali te.” Asalaki makasi mpenza mpo asunga ye, kasi akoki kosunga ye te. Elekeli ye. Azali na—azali na likambo ya kosala te. Nkisi na ye to mbeli na ye ekoki kokoma wana te. Kasi, e Nkolo, eloko moko te eleki mosika mpo na loboko na Yo monene, pe Liloba na Yo nde loboko na Yo. Na bongo tosengi na Yo, Nzambe Molingami, ete, na ntongo oyo, wana ezali biso koloba na Yo, ete Osembola loboko pe Okamata ye, oyo azali na bokono pe akoki komisunga te, mosika na makambo ya zebi, mosika na monganga, tika ete babikisama. Kokisa yango, Nkolo.

⁷⁶ Wana ezali biso kokanisa Dawidi, ndenge bapesaki ye mokumba ya mwa bampate, bobele mwa moke. Kasi mokolo moko ngombolo moko ekotaki, ehangaki mwana na mpate moko wana, ebimaki na yango, pe elingaki kolia yango (ndenge kanser eliaka nzoto), to nkosi monene. Kasi Dawidi, atako azalaki na bibundeli ya malamú te lokola mo—mondoki, to, ayebaki kobunda na mopanga te, kasi azalaki bobele na bilingongo, alandaki mpate wana. Bongo ntango amonaki nyama oyo—oyo elingaki koboma mwana na mpate yango, abomaki nyama yango na bilingongo. Mwa ebundeli ya mpamba oyo ezalaki na eteni ya mposo ya nyama na singa, pe, kasi atielaki yango motema.

⁷⁷ Tozali na moto na mayele mingi ata moko te kati na biso, Nkolo. Tozali bato mpamba na mwa libondeli mpamba, kasi na ntongo ya lelo tozali kolanda mpate ya Tata. Mwasi wana, oyo atambolaki na babalabala, na mawa, komela makaya, azalaki koluka kozua kimia na nzela ya likaya; mobali wana, oyo ayokaki nsolo ya kopo ya masanga pe alingaki kokitisa yango, kasi monguna akangaki ye makasi; elenge mobali to mwasi wana, oyo amekaki kosala bolamu, kasi azangi makasi ya komikangola na mabe; toyeyi na Nkombo na Nkolo Yesu, kosenga mpate yango na molende na ntongo oyo. Tobeti ntembe na monguna; mpamba te ezali eloko ya mpamba, bilingongo, libondeli, kasi toyeyi mpo na kozongisa ye na lopango ya Tata,

na ntina ete tokoka kozongisa monoko mpo na makambo oyo mokumba na yango epesami na maboko na biso. Tika ete nguya na Nzambe emama kondima sikawa, na kati ya mitema na bato, pe ete molimo oyo ebungaki ezonga na ntongo oyo. Tika ete, masenginia ya bomoi oyo ezongisa ye, ekangola ye. Pe tika ete amimona ete abatelami na mapeka ya Molakisi, wana ezali ye kozongisama na kobatelama. Tosengi yango na Nkombo na Yesu. Amen.

⁷⁸ Nzambe apambola bino nyonso. Kino ete tomonana lisusu lobi, napesi liyangani na Ndeko Shakarian. [Maloba mazangi na eteni oyo ya bande—N.D.E.]

[Ndeko Branham asilisi eteni ya misato—N.D.E.]

☆☆☆☆☆☆

⁷⁹ Oyo, na—nabanzi ete bo...ete nazui ngolu mingi koleka na miso na Nzambe pe liboso na bino, na lolenge ete bokoki kondima te ete nakoki kotelema awa mpo na koyebisa bino likambo moko ya lokuta. Eleki mwa mikolo, nautaki kokokisa mibu ntuku mitano na motoba ya mbotama. Oyo ezali bobele Nsango ya mobange moko boye te. Nazali kondima yango uta ntango nazalaki mwana moke. Pe soki oyo ezali solo te, boye nazali zoba oyo aleki bazoba nyonso kati na bato oyo Nzambe atinda na mokili. Napésá bomoi na ngai mobimba mpo na Likambo oyo. Pe tika naloba boye na bosembo: soki nazalaki na bomoi nkoto zomi, nalingaki kobongola ata moke te lolenge na ngai ya komona makambo.

⁸⁰ Sikawa, kobikisama na nzoto ezali mpo na moto nyonso. Kobosana te, kobikisama na nzoto ezali kati na yo. Nzambe atiaki na nzete ya pêche, bambuma ya pêche nyonso oyo elingaki kobima na nzete yango, ntango Alonaki yango na kati ya Elanga. Bomoni, bo...nzete ya pêche to nzete ya pome, to nzete oyo ebotaka mbuma, esengeli bobele kokola, wana ezali yango komela mai uta na mabele. Sikawa moko na moko kati na bino azali na makoki wana kati na ye, mpo na kokangola ye, mpamba te ezali Nzambe, uta olonama kati na Klisto na nzela ya libatisi (libatisi ya mai te), libatisi ya molimo. Bakotaka kati na Klisto na nzela ya libatisi ya mai te. Na nzela ya libatisi ya molimo nde!

⁸¹ Lobi nsima na nzanga, soki Nkolo alingi, nakoloba likolo na yango, *ndenge nini* bazuaka Yango pe mosala na Yango ezali mpenza *nini*. Tokosala yango nsima na nzanga mpo ebebisa manaka ya mayangani na bino ata moke te.

⁸² Sikawa botala, moko na moko na bino azali awa lokola mondimi, bomoni, na bongo Bomoi oyo ezalaki kati na Klisto ezali kati na bino. Ekoki kozala, soki okoki bobele komona yango!

⁸³ Mosala ya Zabulu ezali ete akoba kokanga yo mosika na Yango, ete okoba kozala mokufi miso. Akoki bobele kotika yo ete ozala mokufi miso, elingi koloba, omoni, na ntango wana

okoyeba lisusu epai ozali kokende te. Moto oyo azali mokufi miso akoki koyeba epai azali kokende te, asengeli koluka kozua lisosoli uta na moto oyo akoki komona. Liboso ete tokoka kososola, moto mosusu asengeli koyebisa biso oyo Solo ezali.

⁸⁴ Klisto akufaki mpo na yo, pe opikolami longwa na mokili mpo na kolonama kati na Klisto. Pe nyonso oyo osengeli na yango ezuami mpenza kati na yo, na nzela na libatizi ya Molimo Mosantu. Ezali bongo te? Sikawa eloko bobele moko oyo osengeli kosala ezali ete obanda komela uta na Yango.

⁸⁵ Bongo ntango nzete ezali komela mai, ebandi kobimisa nkasa na yango, kotoya, pe kobota mbuma na yango mbula na mbula. Mbuma ezalaka na mabele te; mbuma ezalaka nde kati na nzete. Boni basosoli yango, baloba “amen.” [Liyangani balobi: “Amen.”—N.D.E] Na bongo, bomoni, mbuma ezalaka nde kati na nzete, pe nzete nyonso esengeli komela uta na liziba na yango. Ntango mbula enokaka, epesaka bomoi na nzete wana, mpo emela mai uta na yango. Pe, wana ezali yango komela, ezali pe kokola.

⁸⁶ Pe ezali kokola kino ekokoma na esika ya kobota felele ndenge mpenza Lingomba ekomi, mpo ebimisa felele na eleko oyo.

⁸⁷ Pe, wana ezali biso komela, tozali pe kokola. Kasi soki nzete eboyi komela, na bongo nzete yango ekoki pe kokola te. Pe soki bolingi mpenza kondima yango sikawa, moto na moto ye moko mpenza!

⁸⁸ Na ntembe te, boyebi ndenge Nkolo asalaka, alakisaka makambo ndenge na ndenge, oyo osala pe oyo osengelaki kosala te, pe bongo na bongo, kati na liyangani. Tozalaki kolikia, na ntongo ya lelo, ete Molimo Mosantu alingaki kokitela biso pe kosala bongo, ntango tozalaki. Kasi nakobaki kozela.

⁸⁹ Nakanisi ete oyo nde epesaka ngai motema mokuse, ntango nazali kokanisa ete, kuna na nse ya etáje, balingi ete tobima awa, bomoni. Kasi bazali na mposa na biso; tolekisi ntango sikawa.

⁹⁰ Kasi bondima likambo oyo, na motema mobimba. Nabondeli bino bondima. Soki na—soki nazui ngolu liboso na bino, lokola moto oyo alobi solo, bondima likambo oyo. Sikawa botia maboko bamoko likolo na—na bamosusu.


⁹¹ Sikawa botala, nzoka nde, Biblia elobi te: “Bilembo oyo ekobila William Branham.” Elobi te: “Ekobila bobele Oral Roberts.” Elobi te: “Ekobila Ndeko Kopp,” to moto moko boye.

⁹² “Bilembo oyo ekobila bango,” na boike, “bakondima. Soko batii maboko likolo na babeli, bakobika.” Ezali nde Nguya na Nzambe oyo ezali kati na yo, nde ezali kopesa Bomoi epai na moto oyo otieli loboko, liziba ya Molimo Mosantu oyo epesaka Bomoi.

⁹³ Nzambe Molingami, na Nkombo na Yesu Klisto, na ntango oyo ya motuya, wana lingomba...tika ete bakoka kotelema na sekonde oyo, na motema mokuse te, pe tika ete Nguya oyo esekwisaki Klisto longwa na nkunda, epesa bomoi na Solo ya Nsango Malamu mpo na bango kaka sikawa, ete etinda ya Yesu ezalaki ete soki “batii maboko likolo na babeli, bakobika.” Tika ete nguya nyonso ya milimo mabe, makono nyonso, maladi nyonso, mpasi nyonso, eloko nyonso oyo ekomeli bato oyo mpo na kotungisa bango, ebima kaka sikawa na nzela na kondima. Lokola bato oyo bazali kondima, tosengi yango na Nkombo na Yesu Klisto. Amen.

⁹⁴ Sikawa botombola maboko pe bopesa Ye masanzoli, soki bondimi ete Asali yango.

⁹⁵ Nzambe molingami, bebe oyo akokufa, Nkolo, soki likambo oyo esalemi te. Napameli litutu oyo, na Nkombo na Yesu Klisto. Etika mwana oyo, ayebi na ye likambo te. Amen.

Sikawa, minganga bameki, kasi bakoki te. Ndimba kaka. 

MOKO KATI NA MILIÓ LIN65-0424

(One In A Million)

Liteya oyo ya Ndeko William Marrion Branham, eteyamaki liboso na Ngelesa mokolo ya póso na ntongo, mikolo 24, sanza ya minei, na mobu 1965, na bolei ya ntongo ya Lisanga ya Bato na Mombongo ya Nsango Malamu Mobimba ya Molóngó na Cafeteria ya Clifton na Los Angeles, Californie, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomamaki pe ekabolamaki na Voice Of God Recordings.

LINGALA

©2006 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org